



### **Zernez Energia 2020 - dumonda da sustegn**

Ün'ulteriura dumonda da sustegn per sanaziuns energeticas d'abitaculs our dal fondo Zernez Energia 2020 es gnüda approvada. Illa fracziun da Zernez vegnan sustgnüts Ursina e Reto Lehner per montar ün indriz fotovoltaic.

### **Sanaziun sarinera Zernez - surdattas da lavurs**

In connex cul proget da la sanaziun sarinera Zernez sun gnüdas surdattas las lavurs d'isolaziun a la ditta Foffa Conrad SA, Zernez e las lavurs per la surtratta speciala da la marschaduoira a la firma Vibak AG, Wollerau.

### **Brail vest, Ils Muots - surdattas da lavurs**

Davo avair surgni il permiss EOZ (permiss per edifizis dadour la zona da fabrica) dals uffizis chantunals pel proget Brail vest, Ils Muots ha la suprastanza cumünala pudü surdar las seguaintas incumbenzas: lavurs sanitarias a la firma Zöllner GmbH, Lavin e lavurs d'impressari a la firma Foffa Conrad SA, Zernez. Il proget gnarà realisà in duos etappas, la prüma tanter settember ed october 2023 e la segunda d'urant la prümavaira e la stà 2024.

### **Plazza da giovar Lavin - surdatta da lavur**

L'incumbenza per las lavurs da giardinier e per montar ils novs ogets pella plazza da giovar a Lavin es gnüda surdatta a la firma db Garten- und Sportanlagen AG, Clostra. Las lavurs gnaran executadas d'urant il mais settember insembel culs collavurats da cumün.

### **Aua da baiver - reparaturas dons da sajetta chasin Rastò - surdatta manisaziun**

Cullas strasoras dals 19 lügl 2023 haja dat ün don da sajetta i'l chasin da la pumpa d'aua da fuond Rastò. Las cumponentas electronicas e da masüraziun sun bruschadas oura. L'installaziun per las novas cumponentas es gnüda surdatta a la firma specialisada Züllig Hach Lange GmbH, Rheineck. Il don s'amunta a passa 10'000 chf.

### **Veiculs da tschintuns - andamaint a partir 2023**

L'Uffizi per il trafic sün via dal Grischun müda la pratica a regard permiss per veiculs cun tschintuns (töf da naiv, quad cun tschintuns, etc.). La suprastanza cumünala ha decis d'agir in avegnir sco fin qua, voul dir da princip esa proibì da trafichar cun tals veiculs sün tuot il territori da cumün. Eir in avegnir daja la pussibilità d'inoltrar üna dumonda per ün permiss special a las Gestions Tecnicas. Quistas dumondas vegnan evaluadas e tuot tenor approvadas da la suprastanza cumünala cun ün permiss special. Quist andamaint va in vigur a partir dals 1. settember 2023.

### **Viafier Retica - prolungaziun binari da lavur in Muglinè, Zernez**

Da la Viafier Retica es entrada la documainta per la progettaziun da la prolungaziun dal binari da lavur in Muglinè, Zernez. La suprastanza cumünala ha acconsenti quista progettaziun in resguardond giavüschs e pretaisas dal cumün.

### **Planisaziun directiva, chantunala - part energia - consultaziun**

La suprastanza cumünala vaiva surdat l'incumbenza d'üna valütaziun da basa da las auas ed auas sül territori cumünal a la ditta Hydro-Solar Water Engineering AG. Ils perits han preparà ils detagls da la consultaziun cumünala. Il gremi ha approvà il sböz da la consultaziun dal plan directiv, part energia a man dals uffizis chantunals.

### **Comune di Livigno - colliaziun da ferrovia Livigno-S-chanf - decisiun da princip**

In occasiun da la visita da rapreschantants dal Cumün da Zernez a Livigno culla tematica principala da l'olimpiada 2026 han ils rapreschantants dal Comune di Livigno dat giö ün protocol chi descriva l'intenziun da proseguir cun l'idea d'üna colliaziun da ferrovia tanter Livigno e S-chanf. La suprastanza cumünala ha tut a cogniziun quist protocol ed agiunt tal cun dumondas implü. Il gremi es da l'avis cha las colliaziuns da ferrovia sur la Regiun Engiadina, Val Müstair e Vnuost ston gnir surstübgias fich bain. Impustüt eir a regard üna lingia da ferrovia tanter Zernez e la Val Müstair cun üna Porta Parc Naziuna a La Drossa. I's metta in dumonda, schi fa sen da realisar güst duos colliaziuns da tunnel da ferrovia tanter l'Engiadina e l'Italia tanter Scuol e S-chanf.

### **Burning Mountain - termin 2024**

Il Cumün da Zernez ha pudü confermar als organisaturs dal festival Burning Mountain il termin per l'ediziun da prossem on. Il festival varà lö tanter ils 27 e 30 gün 2024.

### **Il Cumün da Zernez ha acconsenti ils seguaints permiss da fabrica:**

Parcella no. 0235, Schöpf Uwe, Zernez – platta da beton - dumonda posteriura

Parcella no. 0251, Wiesmann Samuel e Deiss Wiesmann Simone, Zernez – indriz fotovoltaic e solar

Parcella no. 0289, Terretaz SA, Zernez – ingrandimaint büro

Parcella no. 0319, Hotel Selva, Zernez – binderas davant l'hotel

Parcella no. 1004, Denoth Dumeng, Zernez – chasin d'üert

Parcella no. 2044, Clinica Holistica Engiadina AG, Susch – sanaziun interna Chasa Jassa 43

Parcella no. 3061, Dürr Franziska e Reinhard Kurt, Lavin – fabricar oura il tablà

Parcella no. 3420, STWEG Chasa Laret 5-7, Lavin – chamonna d'üert